

青
山
縣
志

地280.235

39

奇志

72376

第四卷

士女志二 列傳

士女志三 高義傳
列女傳

貨殖志

土官志

序志

秀山縣志卷第十

士女志第八之二 列傳目錄

敖秉常一 糜奇瑜子宣哲二 楊芳孫杰三 徐映台附

新四 二糜奇瑾奇璋奇哲熊集元吳學遠附吳昌麟附元鎮蔣附王作

新陳士琮附五 孫宗瑛周彤書吳鼎元六 王達琮七

譚永懋由升堂蕭大士吳熙奎張廷曦田尹耕胡志伊八

黃傳紳從兄傳秀九 諸楊毓秀錦書猷彬連科再瀛洪

勝灼昌十 周世賦聶大彬子姚建春十一 易良圖

子紹十二王恩培傅作珩李贊唐十三 尹顯芝子榮傑附

十四 向百福十五 楊朝林附程高占彪林占魁附

十六 友龍蘇廷虎

敖秉常列傳

敖秉常字敦五其先瑞州高安人也家世名族父法菴遷居秀山秉常生而警慧詞華瞻敏弱冠補縣學生員選丁酉科拔貢生時縣學附試重慶與選皆川東宿彥提學獨激獎秉常文以爲三府二州所僅見由是益以文章顯名所居近城南舊饒竹石泉壑之勝乃修起館宇讀書自娛有終焉之志俄以教習用山東縣丞乾隆四十六年署蓬萊丞尋補昌邑鬱鬱卑官非其好也丞尉閒曹案牘稀簡山東故盛金石秦漢舊刻時出叢巖亂冢間秉常乘暇日行郭外訪古碑碣以一童自隨遇佳山水輒流連賞咏彌日其在蓬萊時嘗代知縣以寬惠爲治有里豪某甲人皆苦其橫暴而無敢誰何秉常誦得狀單騎款門召甲

嚴詞數責甲悚伏請改行卒爲善人一時歎服蓬萊昌邑地皆濱海民氣獷質秉常生際承平盛世而以末秩羈困海鄉其悲慨激昂之意一託之於詩歌然今覽其遺篇皆沖和大雅罕哀怨之音其素所蓄積然與未幾卒官秉常天性懇篤與人無忤仲兄秉綱乾隆中武舉相與友愛甚至一堂之間怡怡如也尤敦飾家法進止以禮乾隆時縣中言名德清門首推敖氏云贊曰季子清族棲遲卑位海氣深荒如聞傷喟竹溪嘯歌槃阿足戀林芳可招清波來鑑

糜奇瑜列傳

糜奇瑜字象輿一字朗峰先世靖州人祖上選乾隆初徙家縣城樸儉習農父昌明字遇春體貌質重讀書通大義家貧廢學爲縣吏主刑獄一以存濟爲心定一死囚累日不懌嘗於嚴冬盛寒請釋輕囚數十有里惡久繫呼昌明言所苦自陳痛悔乃爲盡謀出之卒改行爲善人於是歲時佳節人往往具酒脯修敬或涕泣陳感德昌明茫然都不能記憶云鄉人有爲責家所迫鬻其幼女昌明出錢代償責而私焚其券閭里尤高之子奇瑛奇瑾奇瑜奇琳奇璉奇璋奇瑾奇璋自有傳奇瑜性矜默不苟言笑見人箕踞輒動色相規少受毛詩於邑文學李遇春復隨兄奇瑾學通三禮周易文思敏瞻年十七爲縣學生員乾隆

卷十

士女志

三

五十五年由拔貢生

廷試一等授戶部七品小京官嘉慶三年順天鄉試中式以遷授浙江司主事不獲會試四年充軍機章京十三年轉員外郎郎中十六年外擢福建臺灣兵備道兼督學政十七年

特旨加按察使銜得自奏事臺灣孤懸海表民番雜居漳泉粵三族夙分氣類世尋讎殺睚眦不忍輒嘯侶相攻揭竿竝起輾轉牽引動經歲時簿案累積威禁不行奇瑜率以誠信相結開示大義巡閱所至存問高年召集子弟婦女往復譬勸賞給銀牌花布各有差其悍獨孤寡弱無依者加振恤焉華人有侵占番地爲釐定畛限各安其壤於是民心懷之其風少輟舊有海東書院悉致五廳四縣寒儒入居課肄奇瑜增其資餼並令在

所募建義學歲科校士甄采幽隱居五載政教大行總督汪志伊奏爲閩越治行第一

特旨頒賜御製學政箴清漢各一分以示褒異二十二年遷福建按察使旋擢河南布政使值河北馬營壩儀封二處決口振撫工築均身親臨視二十五年工竣

賞花翎賜羽管一先是河南數被水灾历年緩征各項仍按款歲歲帶征自賈魯河睢衡工興以來應攤銀數積至一千數百萬名目既繁徵收轉急民間鮮有益藏豐歉同病奇瑜愍之爲白巡撫姚亮甫奏請分別諸款以次遞攤於是征科較省民力稍紓道光二年調貴州布政使護理巡撫充壬午鄉試監臨武闈主考累奏列防範苗夷事宜竝以黔局無銅濟鑄請停俸鑲

項內搭置錢文免扣兵役鑄息悉邀

俞允官役稱便凡護撫篆者再遇事振作彌形澹定每語人曰昔耶律文正謂興一利不如除一害生一事不如少一事誠名言也其經國持重可見四年內擢大僕寺卿莅事三載卒官年六十有七歸葬邑縣城北郭門外著有治臺要略一卷子四宣哲良哲聰哲英哲

宣哲字松甫貴選湖北同知改官山西歷任朔平蒲州潞安澤州知府父奇瑜時在黔藩手書誠曰汝等甫登仕籍卽邀大府謬眷階緣際會躡厯劇郡忠信者行灑之本喜怒者僨事之萌地方事視如家私百姓心納諸腔鬲正以率屬儉以檢躬勤慎藉以寡過勞謙終獲吉卜敬勉所事無墮清白宣哲潔己愛民

折節下士雅有父風歷官二紀行篋蕭然卒於任子二升俊二品廕生光祿寺署正邦俊兵馬司副指揮

良哲字次泉後更名良澤位兵部職方司郎中道光三年充癸未科武會試提調官五年出爲廣西柳州府知府尋署右江道良澤性方雅遇事能持大體常督軍征山寇所至無擾屢戰大勝以功

賞花翎及還民士耆老攜送塞途粵人爲作圖賦詩記美之焉年七十餘卒

贊曰太僕挺奇穎發天秀早近樞密晚專封奏治獄高門隱德彌曜臺海瀾清芳芬彌照

楊芳列傳

楊芳字誠村自言爲楊光貴之裔宋理宗淳佑時有楊通晟字思古以征蠻功授孟溪土同知生子四人長光輔次光彤次光隆世爲邑梅平茶石耶三洞土官光貴其季也明代分平茶置溶溪芝麻子坪長官司以光貴裔孫世榮爲之越百餘年而司廢此後譜牒荒闕莫詳其次系云芳世貧微居九江里爲縣中大姓祖父並爲農芳生而沈毅多智略奮踔自喜之幼從里塾學視章句佔畢屑如也其爲文浩瀼充沛下筆常驚諸長老弱冠入銅仁協營充書識乾隆六十年黔楚苗事起大軍四集督師皆王公貴臣芳從都司孫清元率兵應調威勇侯額勒登保一見異其材苗亂平以把總從討川湖教黨每戰輒爲軍鋒累功擢甯陝鎮總兵尋署固原提督初甯陝置新兵驕悍難制芳素以恩信結之及去未幾而甯陝兵變上聞矣於是德楞泰爲

卷十

士女志

六

欽差大臣率芳及楊遇春督兵進剿而賊勢日盛從橫剽掠官軍瘡痍未復又舊與同勞苦多素識雖日合戰終無鬪志故師久無功一日芳語遇春曰叛兵百戰之餘驍悍習地利猝未可制然數與戰見吾與公輒辟易反走是猶有部曲誼可說而下也請自往招撫是時賊眾連營相望人馬擐甲刀光照日如雪或諫以大臣不宜冒危險芳慨然攬轡單騎扣賊壘入見蒲大芳等卽相持哭曰自吾入行間與若曹戮力併命出萬死一生方期永圖懽樂今乃對壘如仇讎念之傷人心吾今來拚一死

不忍見若曹族滅也賊初見芳入眾愕眙聞言則皆哭羅拜既乃縛其倡亂陳先倫等四人以降事平芳坐寬縱釀禍遣戍伊犁未一月有

詔放還降補松桃營千總嘉慶十五年起授廣東右翼鎮總兵尋移鎮西安母喪請終制回里十八年林清叛黨李文成陷滑縣起芳爲河北鎮總兵率兵從楊遇春剿捕有功加提督銜賞雲騎尉世職十九年移軍討陝西三才寇禽僞帥譚貴等調漢中鎮總兵擢遷甘肅提督累任直隸湖南固原道光六年回酋張格爾叛大學士長齡爲揚威將軍陝甘總督楊遇春爲參贊大臣率

王師西討芳請從許之十月戰柯爾坪芳冒險先登七年二月

卷十

士女志

七

攻克沙布都爾阿瓦巴特二城麾兵四戰斬首數萬級收輜重牲畜無慮千億遂度渾河三月復喀什噶爾城黑回降方賊阻渾河爲陳眾十餘萬鼓角震天地會西南風急揚沙撼木芳乘夜出奇兵據上風風沙礮響砰訇搏激賊眾股栗比曉霧霽我軍盡渡乘勢衝突賊大潰既定喀城張格爾先逃獲其甥姪及僞汗並伯克等芳復將六千人收和闐禽其渠玉努斯斬之加騎都尉世職

命在乾清門侍衛上行走時楊遇春亦連復英吉沙葉爾羌二城六月大軍出塞掩捕芳屯阿賴踞蔥嶺之脊浩罕叛酋設伏誘致官軍與戰幾殆

上嚴責諸將懸軍深入

召遇春入關以芳爲參贊大臣

朝命褒異期以熾渠掃穴十二月芳遣黑回縱反間言大兵盡還喀城虛可襲張格爾潛率步騎五百人來覘芳嚴伏以待頃之復遯乃簡精卒親率往追一夜馳行三百里至伊斯里克卡倫平磧萬里風雪裂膚除夕前日至喀爾鐵蓋山張格爾率三十人扳崖走禪將段永福胡超等皆下騎從芳登山短兵徒搏遂生縶以還捷

聞中外悚慰

上作歌詩紀之八年二月行受俘禮勒碑太學及喀爾鐵蓋山詔封芳三等果勇侯

賞戴雙眼花翎

卷十

士女志

八

賜紫韁黃馬褂加太子太保銜畫像

紫光閣居漢大臣第一

上親贊焉子承注給舉人十一月引軍入塞還督固原九年入覲晉太子太傅二等侯

紫禁城騎馬

召見優勞時論榮之芳嘗謂所親曰余以偏陬一營卒階緣際會壯年位通侯富貴思歸故鄉歲時伏臘酒酣行樂固亦生人至歡但思長此汶沒垂辜良時非

聖主殷殷行間所以勸士酬功之意也十三年授四川提督越雋峩邊蠻人滋衅應時討定晉一等侯明年復叛坐降總兵爵二等乞假視墓十六年鎮筭兵叛巡道不能治卽家用芳爲鎮

單總兵馳騎入廳城推誠開諭指索首難者七人立斬之十八年遷廣西提督調湖南廿一年英吉利犯廣東嘉道以來海氛日棘

廷議欲得威重貴臣督軍控鎮因就擢芳以太傅侯充參贊大臣以款議成罷兵還督湖南尋乞骸骨還廿六年薨於九江里第年七十有七謚勤勇芳平居儉素宴客絕珍饌設瓦器時共田父村毗嘲笑爲樂皆忘其爲貴人嘗登雲羅山憑眺賦詩條然有高世之志往在西陲軍中作五言古詩七百三十言自述平生文辭甚美尤工筆札體勢疏勁時人競貴之著平平錄十卷西征筆記二卷子承注以舉人嗣侯孫恩柯恩桓

卷十

士女志

九

仕春秋佳日獨乘馬行山谷中翫流泉賦新詩意宥如也咸豐寇亂閩里逃亡十戶九空孟溪寇包三連眾稱叛旣陷松桃九江里東界直松桃西郭門恩柯居宅與廳城相望男婦避寇入山廬室蕩毀恩柯憤甚因糾合民夫殺寇復城以功

賞藍翎先是父承注卒恩柯例得侯雅不樂入京朝以布衣終嘗自號隱侯云

贊曰泥蟠汗潦思樂鼓鞞躍馬四眇成功而歸寵赫圭組逍遙園田南嶽崖庵靈氣千年

徐映台列傳

徐映台字奎垣一字西堂漢徵士稗後也世居南昌豐城父轡
乾隆中旅游至秀山贅於石耶楊氏遂爲縣人映台生有異稟
讀書目數行下一過成誦總角以神童稱少通率不羈家貧從
諸楊爲黃冠服者游歷黔蜀閒乙卯苗變後松桃盛設佛會映
台爲文牘通衢同知某過而詫之以爲事理賅舉情韻惻楚雖
唐人弔古戰場作殆無以過敦延至署資令卒學遂益綜覈經
傳廣擷圖史自周秦諸子七略所稱下暨方伎雜流道藏釋典
靡不窺涉儲蓄甚富文思捷給援筆千言立就古芬逸藻離奇
襲紙嘉慶十三年提學史望之拔冠一邑謂開考後僅見此才
是年舉鄉試第一入都貴顯爭欲致門下迄無所就不第歸映

台才性踈弛不屑屑自表暴浮沈里閭以醫術自鳴貧益甚復
游都下數年無所遇以疾卒聞者惜之著象占撮秘十八卷其
後有吳新民字炳文亦具奇慧讀書好探蹟奧不厭苦思每獲
一義恆在人意表尤善文詞嘗著閏七夕賦逸麗絕倫一時稱
之早卒

贊曰祕塵曜和挺材恢令釋服學誦通古博文窮巷寂寞華銷
歲晚騫采猶飛垂芳未減

二糜吳熊蔣陳列傳

糜奇璋子炳哲附吳秀瑛王作新吳昌麟左席珍

糜奇瑾字玉圃父昌明事具其弟奇瑜傳中奇瑾嘉慶初歲貢生敦樸率禮跬步必飾早爲里塾師尤嚴繩檢灑掃進退秩秩如也弟奇瑜幼從受經及貴爲封圻重臣爲采錄自古名臣循吏行事成政績滙覽十二卷奇瑜爲序刊之嘗置左右以爲弦韋之助云初秀山無專學附額西陽奇瑾旣以高行碩德負時重望倡言請學因畱成都三年時騰牒監司抗辭爭執事卒得行弟奇璋字瑞五質直有氣幹亦嘉慶時貢生凡處疑事大議識論開決一時稱重道光初分建酉陽試棚官勸民士助資請奇瑾監局時已老矣則奇璋分其勞彭水故近重慶不樂改棚彭水令某說督學言山潦壞塗不可行督學雅不欲入山卽因

卷十

士女志

十一

止不進縣士大謹奇璋偕州人過光華倍道走重慶訴狀事旣定而供帳非三千金不辦乃共光華計稱貸而還其後光華牽沮謗言捐輸不能盡收所貸金無可償因坐下獄破其家奇璋慨然請分承之或爲不平曰此非過君之咎也人以是益服其德量焉與兄奇瑾並以老疾卒子炳哲字麗中端樸能世其家爲縣學增生以助城防功保同知銜候選知縣咸同間縣中兵徭土木司計所出入過萬千官士多倚辦之以勤能稱

吳學邃字心圃嘉慶時副貢生初知縣吳桂月課書院生徒得學邃文大賞之風令進取以親老固辭久之中副榜再上鄉舉臨期疾發乃益絕意科目還山柴門教授弦誦自樂門下著錄甚眾動止率有程槩性疏介菜羹蔬食與賓客生徒日對講執

意欣如也吳氏大族男婦千百皆雅重學遂有爭輒相質得其一言而釋族姓中同時稱老師有吳秀瑛其後有吳昌麟皆一時敦篤老儒秀瑛乾隆中貢生於學遂爲父行嘗從受經昌麟字靄人縣附學生居城北不輕入市郭晚年尤喜說易終日講論不倦年八十餘以微疾卒

熊集元字菊圃父尙義蚤卒母吳氏以節聞集元生有至性父喪哀毀如成人家貧篤學其母篝鐙紡織恆至夜分集元執一卷就鐙讀母織未輟未嘗罷讀後中嘉慶三年副榜選鄆縣教諭其母死有年矣頗以不獲祿養爲痛言輒流涕集元早爲鄉里大師及在鄆縣士皆百里負極請業最善教迪學人欣欣焉未幾以風疾免旣還閉門閒居不與世事相聞卒年八十五

卷十

士女志

十二

蔣元鎮字春圃道光初恩貢生操履純篤爲學通章句而已尤好宋儒書其爲鳳臺院長教生徒出入有節弦雅之聲琅然知縣夏觀瀾循吏也獨重元鎮過從親禮甚歡未嘗干以私觀瀾榜示學者稱爲年高德劭行芳志潔時人以爲知言同時王作新亦以教授爲大師中道光二年副榜

陳士琮字碧璘父開華附學生授徒自給士琮早歲涉學精敏過人性誕率喜談笑然耿介質直意絕阿比以方正見稱執業相從者日眾朝夕講說涉論高妙聞者渙然最善王達琮並以文章爲知縣于蔚華所奇賞達琮文醅雅質慤肖其爲人士琮每有作輒嬉笑狂走或時枯坐若木石而滌毫落紙辭理俱超當時以茂齡負盛譽推二琮云方達琮爲禮部郎中千里遺書

風以進取士琮笑曰屏山將坐我泥塗耶以歲貢終晚年恣情
游釣不喜言著書其於經傳難疑片言洞釋年八十餘卒其父
高足弟子有左席珍字玉田亦咸豐時歲貢生恂篤好學生徒
數百家貧恆抑鬱不少發舒嘗著苦竹詩以見志音響哀激其
愁怨可知矣

贊曰國有黃髮傳經淑後山水情情懷我耆舊糜倡黌校熊篤
孝思陳子超然夷惠如期

孫周吳列傳

孫宗瑛字竹嶼幼慧七歲能詩年十五補縣學生員充嘉慶六年選拔貢生時以西秀分學未申請置額部議除名尋中十三年順天副榜以謄錄議敘鹽場大使改知縣分山東補用署禹城城武沂水淄川四縣所至以清惠聞未幾補黃縣署登州海防同知薦卓異調補滕縣以憂歸服闋補攸縣知縣署芷江湘陰二縣事調補善化宗瑛勤於吏治屢以幹略薦任繁劇循聲日起會遷鳳凰廳同知入都卒於邢台旅次其在山東兩爲鄉試同考官所拔皆一時髦儁治盜尤有聲千里擿發如神著勸盜說一篇居官法戒二卷

周彤書字笏山初名玉書避張文貞公諱改焉選道光五年拔貢生以母憂不與

卷十

士女志

十四

廷試服闋入都館大學士卓秉恬家旋考充正紅旗教習期滿叙用安徽知縣二十四年攝貴池縣事政尙寬平民庶樂附調充江南鄉試同考官甄采多一時名彥前四川提學楊秉璋所薦舉士也二十七年移知望江值春水氾溢衝決西圩破壞田廬無算災民踉蹌悉避入城彤書輸俸貲五百金計口授振身親存卹立白院司發官帑四千金濟之水平爲經紀復其故業賴存者數千家歷知桐城歙縣並著循聲咸豐四年遷來安是時粵寇充斥所過無堅城來安仍歲荒旱民不宿飽彤書至繕治城守未畢而寇猝臨兵儲俱匱束臂待援城陷彤書改服脫難就近鄉募勇敢士還攻城連戰克之大吏以爲能解任佐理

滁陽復調合肥檄辦承訊局事諸務煩劇略無暇晷時鄉民被掠賊中乘間逸出往往遭團丁結獲械繫送官得賞以去囚不任刑誣服承叛黨日有誅戮彤書廉得其情盡釋遣歸所全活百餘口七年夏以勞卒長子以仁候補縣丞從復來安陣亡三子以恕候選知縣城陷巷戰力竭被執不屈死並議卹如例事具來安縣志

吳鼎元字杏亭道光時舉人家貧篤學操履約素爲鳳臺院長教生徒以禮進退肅然以截取補河水知縣一以廉靜儒術爲政誓不妄取民間一錢居官亦如其在塾時布衣蔬食泊如也河水故荒僻亂後田野曠蕪尤多鼎元勸民耕作散給牛種暇則進諸生與講說如師弟月試高等異常禮獎縣人翕然鄉學

卷十

士女志

十五

值有兵過境軍長某總督故人也因索芻供不得縱士卒大譁鼎元不爲動曰吾不能爲容悅以煩吾百姓也會以事如蘭州總督某公微詢其事具以實對詞氣不撓久之遷循化同知未至任以疾卒年七十二家無餘財妻子還居里巷才給朝夕焉贊曰釋褐鳴琴學優從政貞素無渝邁時匪令吳挫驕卒周復危城竹嶼從容濯名濟湘

王達琮列傳

王達琮字屏山先世淑浦人高祖仕永雍正初避族徧移居縣南曾祖守德祖文元累世隱德父行之字東橋幼失學爲蕩游弱冠始折節讀書文譽日起遂有名諸生間性至孝年五十事其祖父母出入必請滌廁皆躬親嘗推烏峰遺產二百畝與其季弟閭里尤難之達琮性坦易平居無疾言遽色然儀望肅穆人自不犯爲學務測實際尤精掣宋儒性理諸書少讀書鳳臺書院江都于蔚華以名進士知縣事方以文雅提倡尤重達琮命之從游所業益進中道光辛丑科進士由禮部主事轉員外郎遷郎中爲主客精膳祠祭儀制四司掌印郎中居官十有七年清亮宣勤案無稽牒號爲稱職咸豐十年充庚申

恩科會試提調官尋因會議戊午順天鄉闈內監試尹耕雲處分失舉條例呈吏議降階調用先是耕雲議英夷戰和事忤怡鄭二王二王當軸欲因中傷之故有是命禮部堂司官悉被議時郎中猶可援例奏復達琮決意引歸同治初黔苗不靖邑梅處縣南垂地當要衝慮禍尤迫達琮率鄉人相險阨築砦堡熟籌守禦事宜工甫竣粵寇李復猷黔寇包茅先先後犯境恣情蹂躪諸村焚掠一空惟邑梅憑砦自固保全萬計時黔賊窟據近邊覬覦縣城中兵單饟匱應募率多鄉農難任颯擊且倉卒之眾勢不持久達琮馳如成都告急總督駱秉章檄曾李楊三總兵各率所部兼程赴援大破賊於濫橋陣擒包逆餘眾潰散闔境以安五年三月卒於家年六十有三達琮生平梃絕聲

色繩檢周慎誠信與人不爲逆億然遇事能斷無所貸假在部
日直省提學或請以子產孟皮從祀孔庭羣議參互達琮毅然
爭之手定疏藁事遂允行所著有易說古大學說中庸管見孟
子管見牧民邇言各一卷雙峰書屋文鈔紀游小草四卷晚好
壬遁相墓術著有地學仁孝淵源錄葬經注子念祖附貢生候
選訓導繩祖同治癸酉科舉人江西候補知縣懋祖貴州候補
同知署龍泉南安二縣知縣煥祖翰林孔目
贊曰王氏世學睹奧升堂迴翔清要廿載曹郎議政不阿歸田
養素亦文亦儒式昭行故

譚由蕭吳張田胡列傳

譚永懋字績之家貧早孤母白以節聞樵蘇自給貢生戴尙仁
教授里中永懋爲館僮供掃爨日聞講說略能通悟尙仁初易
之後每講輒伏聽與語大悅遽令受書且爨且讀學徒或使爲
文率清通可誦尙仁訶得實瞿然曰吾幾失此人因益獎進資
給筆札項之補縣學生員時西秀方共學而提學案試附棚重
慶水陸艱遠永懋顛連困苦僅獲一至以諸生終事母誠孝藜
藿不充能曲得歡心母嘗患瘡毒醫者言須淨除淤惡永懋口
吮之創甚母子相持泣哀動鄰里家居投徒時以經訓相切劘
年逾八十考論不倦稱耆宿焉著詩經纂義十卷

由升堂字石櫺道光時貢生性高曠好吟詩千言下筆立就名

卷十

士女志

十八

噪一時與人樂易無崖岸然方介自守恥爲干謁所居臨江面
城不輕履市郭陳兆沅爲典史結詩社盛文酒之會時相過從
唱和無虛日未嘗一語及私喜言易曰易者象而已因物取象
因象見道無假文辭自饒名理著易无字書十二卷睡鶴山莊
詩集四卷

蕭大士字希賢少簡默有志操篤好墳典斐然有述作之意旣
爲諸生益厭時學妍陋汎覽諸經義疏旁及三史通鑑百家雜
書又惡爲汗漫無歸之學每孳一經務挈綱領窮年累月矻矻
無休遂絕意進取柴門授徒自給晚以易占多奇中然不欲自
炫或有所叩因事風諭鄉人化其行號雝雝云著周易彙纂四
卷春秋左氏補義十卷家禮述宜二卷弟子規一卷小學韻語

一卷

吳熙奎字亮亭道光時諸生事親克孝母病夜不解帶者七年每盛怒聞父母呼止卽改顏溫慰性樸謹嗜學喜吟咏尤好宋儒書以修身爲務不空言性理居嘗以禮率其鄉人或有不逞則集父老剴辭數責往往感泣去焉西陽屯田之與欺侵百端熙奎監局事近二十年獨以端介聞晚年手寫老子日誦之退然如不知學年六十四卒著理學纂要四卷孝子傳一卷孝思錄三卷傳忠錄三卷正氣錄三卷正誼明道錄六卷半農吟草二卷

張廷曦字曉村居彭水之郁山先世爲犍郁鹽引商引銷所至例得著籍故廷曦入秀山學中道光十七年舉人丰儀秀朗篤行誼擅文章郁山巡檢柴樹榮以貪污結民怨廷曦指列贓跡直揭院司樹榮故與彭水令某有隙疑爲所嗾則騰牒交訐遂起大獄下巡道案鞫聞者悚慄廷曦抗辭陳辨事卒得直咸豐軍興所在治團堡練民兵官士共行之廷曦以端雅負一時鄉里重望長吏數禮請堅辭不起里居教授事母孝養有聞卒年五十餘著曉村詩集四卷

田尹耕字莘農幼警慧家貧篤學嘗負板走千里從名師往來邵陽新化間與其鄉之賢俊游所業益進遂爲名諸生遠近相從問業日眾一時稱大師好爲詩歌然不自愛惜成輒棄去卒後其兄望耕爲撰集爲二卷曰莘農詩鈔云

胡志伊字覺軒地跡不羈嗜酒好議論弱冠補諸生文名藉甚

貧不能給饗殮其婦樵蘇行汲志伊擁書自讀不以措意所居
阻山谷近苗峒日與邨氓爲羣益不得發舒破帽單衫挈一瓶
徜徉墟市中向人怒罵嬉笑無常度時或忼慨悲歌涕下橫頤
嘗賦老馬行以見志以縱酒早卒著左傳紀事本末長編二十
卷聽雨樓集五卷

贊曰諸子學道肄雅式訓濯名清流抗情高詠柴門菽水養志
樂親誥誥學校以明人倫

黃傳紳字薦斯父家祥性疏豪喜施與鄉人或屢貸其金見輒嘲罵既乃曰若益貧耶卽又假之間里感其德相戒毋欺傳紳幼慧十四爲諸生與從兄傳秀齊聲譽序時號二儒以拔貢生考充八旗教習旋中順天鄉試副榜教習期滿出用山西知縣二十九年署汾西縣事移陽城父憂服闋改仕陝西歷知涇陽寶雞長安渭南等縣銳志當官所在以稱職聞同治三年授蒲城知縣縣境盛山夙號山蒲民俗悍勁又與渭南比壤渭南故多劇俠間出鈔暴去來兩邑間儵忽靡常傳紳至鋤刈好莠日不暇給有盜魁某尤桀黠徒黨甚眾傳紳跡得之捕繫獄中將加按治會歲灾得請蠲租就城設振飢民絡繹道上盜黨乘圍

入城夜中突起劫獄傳紳聞變呼左右僅數人與鬪不勝被重創卒汾西陽城民間之越疆往弔涇寶長渭四縣民相率哭德政碑下三日先是邑士某偵知盜謀密以相告傳紳性伉直以爲不實而不備故及於難巡撫譚鍾麟奏論其賢

詔給治喪銀百兩予雲騎尉世職其後郎中雷兆元等牒陳院司請於蒲城建立專祠寶鷄民亦請附祀於李提督祠護撫院王恩沂復疏以聞並獲

俞允一時榮之方傳紳知寶鷄時縣新被寇四境彫殘歲又仍歉傳紳日行瓦礫榛蔓中多方存濟同治七年二月寇復來犯急牒乞援提督李輝武將偏師一戰走之遂畱寶鷄防守亦頗著恩惠故縣人並祠焉恩沂言傳紳遇害日寶鷄父老巷哭輟

市蓋非虛語云

傳秀字子俊傳紳從兄也風儀秀整幼盛文舉時人歎羨謂爲神仙中人道光中舉於鄉再上不第遂畱京師時華陽卓公方爲大學士傳秀以鄉人投刺入謁一見親禮稱爲美才久之益落拓無所遇自傷困抑居恆怏怏俄發疾卒喪還卓公爲詩弔之致哀歎焉婦楊氏賦性貞靜以節孝聞子丙華咸豐時拔貢生其後有華岳字壽山亦美秀而文才藻斐然年十六爲縣學生性耽詞賦尤工爲側豔之辭自入學釋奠甫數月以瘵卒贊曰治蒲鳴弦乃邁鴉音桐鄉詠德民懷到今難兄驂斬千里殊駕玉折蘭摧靈芳枉謝

諸楊列傳

楊毓秀字炳江宋平茶土知府光彤後也家世具土官篇秀山諸楊皆祖通晟分邑梅平茶石耶地壩四族光彤則通晟第二子而爲平茶始祖云自宋以來越四五百年楊氏子姓繁衍益云盛矣改土後百年中名材颯起尤顯者芳朝林皆自有傳毓秀嘉慶時舉人樸雅嗜學爲鳳臺院長生徒數百歸然稱大師三上不第久之選德陽教諭德陽故多訟其涉昏姻學校皆主於學官吏役百餘人毓秀至大非怪之力革敝俗歲饑勸振及建德陽節孝總坊皆出奉錢爲倡官士稱歎焉居德陽十七年士依之如家人成業者眾未幾遷重慶教授清介有聲年八十一卒於官子猷升廣西候補府經歷同里有錦書字西山猷彬

卷十

士女志

二十三

字勲廷皆歲貢生高年宿德稱重一時

楊連科字松雲亦通晟之裔先世遷酉陽連科積軍功至平番營守備道光中署邑梅守備因家焉性至孝生一歲而喪母事後母敬順終身無間言咸豐五年率夔綏七營兵援廣西爲向榮左翼長以樸勇見知累遷儘先副將

賞花翎創發病卒

褒卹如例子再瀛字仙洲意度恢廓以諸生治鄉兵擢訓導再經治兵有膽畧其後有楊洪坤者亦質直能兵累功至副將楊氏起武科乾隆時有正杰字斗南多力能挽十五石弓至同治間煥奎以武進士擢千總其兄燮元亦武舉

楊正蔚字蒼廷先世爲地壩長官父再松家貧篤善正蔚幼警

敏九歲喪母從塾師讀孝經輒涕泣不能成誦弱冠廢學治家人生產與人媮慤無欺然性戇直不能爲唯阿意所弗善面斥無假人敬憚之嘗恥己不學亟督子弟雅業走千里聘名師脩脯豐異而家庭儉素自奉尤嗇中年稍給於財遽出百金置義塚咸豐中歲大饑挾五百金如楚市穀平價至沅陵覆舟時山潦方盛一舟皆溺正蔚獨免人以爲善感云因是益欣勵以周濟爲務施棺槨藥餌絮衣糜粥歲以爲常兄正芳早卒遺孤並幼正蔚撫之逾所出恩義篤至皆成名爲諸生人尤以爲難雅重師儒雖盛怒值之輒改顏或有非禮之干亦折節傾下之故其後卒以科第顯稱名門焉年五十五卒

楊秀好其先爲牙阻邊蠻總管遂世爲牙阻人蓋邑梅族也秀

卷十

士女志

二十四

好任俠尙義喜積書鄉里有昏喪不能成禮或凍餒窮急輒呼秀好乞助資無弗應者有同母姊及兄女夫家皆貧各置田給使耕於是義聲顯聞遠近無告者多依之副榜王作新其子師也因赴秋舉從貸百金秀好陰焚其券人無知者年六十四卒同時族姓中以焚券稱高義有再寬勝灼並平茶長官後再寬尤務施濟年至八十六近歲有楊昌裔楊光潤亦篤行誼昌裔字開後年十三侍父疾以孝聞與人相勸於善終身無失德光潤字雨田早孤事母孝養無違嘗割產入公祠爲祭田宗黨稱之皆平茶族云

贊曰四峒雲黝二川鏡綠激宕百年蒸爲士族高曾初來連裾翔采逝矣永懷清名世藹

周聶姚列傳 附王富宗

周世賦農家子也少跣跣任俠自喜乾隆末永綏松桃苗亂大學士署四川總督孫士毅總大軍駐秀山防剿令總兵袁國璜率偏師屯石堤世賦聞之蹶然起曰如此吾屬虜矣因登高山相度地形麻鞋帕首走大營陳地圖言石堤軍失險不足扼守請移兵駐山梁芻米之供願以身任士毅聽其言檄下國璜以世賦習地利並交遣用國璜得檄大恚既至喜曰此天險也駭駭禮異之翌日世賦馳還召集鄉中耆老子弟言山道崎嶇官軍轉運艱吾前許供其饟言不可食今請共諸公圖計眾欣諾爭先輸納得米三百石牛四十八頭別募鄉兵五百自將以往俄苗眾吹角連陳攻山國璜揮軍拒擊鄉兵從之斬獲千計於是和琳已破走爆山苗會福康安於松桃永綏苗既久阻國璜軍不得進其勢大蹙事定國璜欲上其功峻辭固謝曰吾圖衛鄉里耳非有功名之志也釋仗竟歸世賦未嘗學問冠服疏野然其任事果決膽識兼人言論丰采偉如也既還爲農縣官歲時存問或題閭表異邊境有事訪之後行年六十餘卒穿河蓋爲縣東南界大山國璜旣扼此建殊功里人名其舊營地曰得勝坡立廟祠關侯祀國璜世賦置石主焉

聶大彬字質尙體貌魁奇尙氣喜施乾隆苗亂縣東南蹂躪無安土所居龍潭壩去苗蹤不甘里因結市民置防守急遣白大軍援兵至屯龍王寨日與苗相持猝不敢動大彬募鄉勇三百助戰說軍長曰苗勢烏合最畏聞礮聲然其凶很異常臨陳尤

鋒銳我軍單少未足震懾有破陷耳請夜中多然炬爲疑兵以驚彼眾軍長並從之連戰皆勝及苗越山遯走大彬率眾追奔斬二酋大學士孫士毅奇賞之獎賚優異命留營充鄉導官以親老辭嘉慶十八年夏旱苦饑道殣相望大彬出穀數百石減糶平價全濟甚眾知縣程淳表其閭年四十八卒子永煊

永煊字耀南大彬第六子也樸質和易多力善弓馬道光中以武舉入綏甯協標海夷事起從副將楊開雲屯防廣東以勤篤見知還署平茶平塊石堤興隆各汛興隆石堤並去州縣治遠小民酒食睚眦往往造汎乞理汎官故多貧約因以爲利納千錢以上卽不復有黑白永煊獨恥之民有來質善言慰遣或以杯酒交歡故所至無擾終任不名一錢民頌大洽其去興隆汎

卷十

士女志

二十六

曰男婦攜送塞途有泣下者自文武分途律令所以責汎官比於縣令而人之視之無甚重輕不肖者卽亦自猥鄙甘處於無足重輕之數徒狃小利授人口實所得固未足紓其貧然愈貧而患得之念愈甚傷哉貧之爲病也潔清若永煊誠所謂邈世而獨立焉永煊早喪婦有子義不更取性喜諧謔閭里有爭人百言莫解嘗以談笑排止之卒年六十三

姚建春字西屏道光時武生樸幹爲鄉里推敬咸豐軍興所在治團練王達琮以在籍郎中倡起鄉團尤汲汲砦堡民徃承平憚興作無應者建春獨唱和之土木工役皆倚辦自黔寇犯境縣中連歲用兵知縣李漸鴻屢出拒寇建春率團勇爲聲援水到之役官軍與寇相持一水而守備舒芳申已敗死邑梅勢甚

洶洶建春扼晏農斷賊歸路一戰勝之斬首數百時旣頻有寇患民轉死流離廬舍皆虛邑梅尤當寇衝出沒無時建春益慨憤剋日築堡連結數千家謐然安集於是平茶地壩諸鄉方罹粵寇之禍伏尸流血百里蕭條寇繞行其砦下三晝夜眾號十餘萬人人股栗卒以扼險獲保砦堡之患尤在乏食建春上議請計畝入粟凡邑梅大小廿餘砦積穀近三千石至今以爲利累功擢守備

賞藍翎年七十八卒同里王富宗者亦質直尙義助建春治團練每戰必偕一時交倚之贊曰閭左耀兵諸子崛起周樂耕田聶伏鄉里西屏泥拔纓被匪求耀南和介尺伍之尤

易良圖列傳

子紹賡

易良圖字鳳山先世由湖南沅州徙家秀山父義文歲貢生里居教授多所成就良圖左目重瞳子幼耽學博聞彊識文譽藉甚咸豐五年黔匪犯境知縣李漸鴻率團丁拒戰良圖贊畫軍旅動中機要事平以歲貢生保授教諭銓任射洪九年松桃叛民郎官等據貓貓山綿州知州毛震壽總辦酉秀軍務大府以良圖鄉里嫻習檄歸相助辦賊奏凱回任是時粵寇石達開大舉犯蜀列城戒嚴良圖條陳時事略曰講武禽賊不若置兵邊邑川省環境皆山門戶重峻如劔閣夔州酉陽永甯等處所謂一人荷戟萬夫趨趨若得文武兼資之員就彼處招募成旅富民出財貧民出力在全省以爲防邊境在本處以爲保身家民

卷十

士女志

二十六

爲保地方計或不竭力爲保身家計無不盡誠夫捍賊於門垣之外守之上者也一經闖入內地則處處設防勢不兼顧矣又曰外匪未至先防土匪欲淨土匪根萌責成地方官吏平時不逞之徒無不與文官隸役武吏海查聲息相通故稽察鄉閭首須釐剔衙署地方官稍不廉謹妄生徇庇此輩藏奸藪慝專與鄉戶爲難編聯團練動形掣制一聞警耗所在蠢起舟中皆敵矣又曰選兵不如擇將有一二好將卽有千萬勝兵干城腹心何地蔑有振興鼓舞存乎其人若營弁高下上官素不爲意升遷調署祇憑中軍遞單一有濫抑豪傑隳志今宜乘賊未偪急簡智勇卓越之員語言獎厲邁次擢錄藉收死効又曰練氣不如練心兵丁平日不識忠君死事大義心不明則志不定膽不

決力不勇臨陣回縮病皆坐此宜擇副參都守明達理道者專司講導上官以時身親獎訓鼓其意興使人思自奮朋友猶以死許况上官乎此轉弱爲強之術也又曰患睹未形事防其漸一爲捐輸一爲飢氓捐輸之作本非獲己小民食毛踐土感戴高厚靡不踴躍從公惟或任非其人恣情中飽風聞近歲有取多而報寡者踵而行之慮生意外今年春旱山田祇種十之三四川北一帶尤甚滇黔毘界結隊流徙奸人誘倡卽成釁端明季事可鑒也總督駱秉章善其策檄辦射洪城守事良圖輸俸增修樓堞十一年二月二十一日逆賊藍大順突入陷城官吏逃散良圖與訓導熊公率團丁巷戰力竭死之事聞議卹如例良圖性方直瞻視不輕竟日危坐無弛容雖盛暑不袒家庭肅

卷十

士女志

二十九

若嘗著事天箴一篇時自警厲以世俗喜言果報乃彙經傳中福善禍淫迪吉逆凶諸語以爲報應之理儒者常譚何必持齋宣號遠述彼教少受知邑令江都于蔚華偕其子肄業內齋因得汎覽羣籍爲文好冥思鑱章鍛句力矯蕪靡屢躋場屋鄉試十三次不售而意氣自如設教里塾垂三十年獎掖後進常如不及射洪有蘇雲達者髫歲入庠貧不能具贄幣良圖資令竟學旋領鄉薦又能以善服人射洪里正某夙號恣睢良圖召使前溫言牖喻其人卽大悟改行自負才地慷慨好爲奇節貓山之役弟良直擊賊陣亡戚屬唁之良圖曰人誰不死如此死無恨吾在軍中人以武代吾憂吾方處若晏然死事之歲自知不承是月上丁釋奠詣

先聖坐禱請假年學易旋寢良直來迎辭以注易未竟越旬果
驗年五十有一歸葬祖塋著有周易易解四卷長子紹宣承襲
雲騎尉蚤卒次紹賡

紹賡字肖山一字廷言生二歲及射洪之難母黃生母楊挈之
避寇山中困苦流離卒還里門性至孝事母無違篤敏好學弱
冠爲名諸生中光緒八年舉人再上不第意恆怏怏遂獲心疾
時呼號憤狂或被髮向天痛哭人問之則瞠目視不復出一言
歸舟至武陵卒於館舍年二十有八紹賡少沈默有大志跬步
中禮文章道雅度越時賢然好苦吟往往多哀激之響遂以鬱
死聞者痛惜之無子以從兄子舜哲爲後

贊曰書生挾策甯云干時論兵侃侃博袖委蛇邁會屯厄頸血
膏涂英英令子運蹇文舒

卷十

士女志

三十

王傅李列傳 附王熙

王恩培字厚庵家世式微幼孤母田氏傭工自給恩培資性穎慧蚤從里塾學楷蹟端勁有瀟貧不能竟其業隨母依季父金鏞金鏞故縣戶科掾遂入充鈔胥知縣廖應麒賞異之召使供給內齋解任從至成都會按察使張日景筆札需人應麒以恩培進逾年日景擢河南布政使挈與偕往恩培素篤誠邊幅修整而幹剛敏練遂大被信委居數年入貲以未入流候銓粵逆起衅恩培赴大營立効晉府經縣丞假歸值黔寇數千犯境縣城戒嚴知縣事李漸鴻遣恩培就近鄉招募得壯丁數百與廩生傅作珩分將之擊寇火燒橋伏發恩培幾不免作珩揮眾乘之寇乃遯走是年冬松桃土寇包三等復數道入鈔恩培率民

卷十

士女志

三十一

兵四出剿捕連戰皆捷積功擢知縣旋授北流知縣時廣西甫經大創兵民罷敝北流爲土寇王亮甘模等叛據積十餘載恩培至廣設方略親率鄉兵拏擊全境廓清竝隨大軍攻克容縣岑溪二城奉檄兼知容縣事初定兩邑士庶脅迫從寇者咸危慄懷不自安或請入重金求免治恩培正色却之剖誠開諭散給門牌前事一無所問眾始帖然在任數年聲譽日起民懷其德釀金爲建生祠尋擢同知直隸州知州

賞花翎加知府銜母憂去職大吏倚其能下檄令監南甯釐金服闋以微事忤上官散置未幾卒年五十有八歸葬龍潭灞恩培夙性孝友自河南歸出所挾萬金裝三之以二奉金鏞及伯兄某事母怡然邑養邑士以爲難雅不善治產身沒未幾生業

蕩然子振剛廣西候補巡檢署鬱林州州判

傅作珩字春蕃少倜儻有志局意氣不可一世弱冠補諸生八試不舉是時洪秀全倡亂廣西所在盜賊蠡屯咸豐二年作珩如桂林遨遊諸軍間總兵劉長清檄領潮勇千人援道州轉戰郴桂由衡陽趣長沙潮勇橫暴絕人理所至騷掠雖比有功屢爲議者所斷斷作珩憤悔釋兵邊歸五年三月遵義殘寇吳勝才率眾犯秀山知縣李漸鴻倚作珩知兵與議拒守之策俄將民兵敗寇還城乃益相親結包三叛孟溪挾術扇民剋期連下數城黔邊大震縣南諸鄉人人危栗半籍名寇中民間飛語云漸鴻亡走作珩訶知非實亟入告曰人心搖懼都不能釋然於公使賊卽臨城下將奈何漸鴻慨然誓死守因益相勉於大義

卷十

士女志

三十一

趣繕城防召團練頃之寇掠濫橋邑梅而迂架官莊亦連陷沒兩道夾偏縣城哨旗相望漸鴻出萬死大小十餘戰斬馘數千皆作珩主其軍謀屢出奇計或親從薄陳所部最號能戰敢深入官軍嘗約數道攻邑梅屯寇尋爲別黨牽阻恐失期誤他軍作珩憤甚直前搏擊眾乘之寇披靡解去事平作珩功最與王恩培竝以知縣論薦會爲怨家中傷總督吳振械覈除其名聞者寃之或乃言其怨望結外寇官吏大疑設謀邏防久之寢息因是愈自斂晦絕口不復言兵九年松桃山寇復起知縣劉鍾璟儒吏也溫言強起之然而志意已稍稍衰矣以薦得府經歷賞藍翎自言非其功其攻山寇往反旬日而已作珩旣自傷坎壈志日不得舒乃發憤去鄉里浪游江淮河汭之間依鮑超楊

鼎勳皆以文士遇之隨疏保知縣游擢直隸州知州分江蘇補用時初承平疆臣一意休息作珩沒沒無所短長年六十五卒於彭城旅舍識作珩者皆愍其遇時屯蹇未盡其材量云同時有王熙字晉五以諸生爲鮑超主書記相從幾卅年積勞保知州加知府銜性疏簡意有不可於人輒面折之以是頗蒙怨謗絕援繫官久不得除至老猶旅食夔鮑超雅重熙爲人時廩給焉光緒初謁選如都未幾卒熙自少以局幹自喜工筆札與傅作珩王恩培齊名友善而恩培尤善李贊唐

李贊唐字梯亭早孤事母至孝家貧廢學從羣賈居市起家累萬慷慨喜施意度恢宏宗族姻郇待舉火者以數十母陳性方整尤嚴督子婦事在其傳贊唐終身敬順無違失母卒勺飲不

卷十

士女志

三十三

入口者七日哀毀骨立里巷歎美焉王恩培者於贊唐爲中表行幼同閭閈以意氣相傾結恩培由軍功得官從貸五百金置辦裝具旣補北流知縣則郵書邀贊唐當是時寇盜充斥廣西列城糜爛尤甚恩培旣從大軍復容縣遂兼攝縣事二治故比壤然安集拊慰勢有難給素服贊唐清幹因請代行視事三月恩培惟以受印及交代兩至縣而已自土寇屯據小民流亡失業租稅積欠逾數萬金贊唐集縉紳博議聽民自納所入萬計一無襦染人尤以爲難恩培推功欲以丞尉薦保固辭止之方恩培選官時有王某者傾橐助資頃之窮迫至秀山而贊唐適從廣西還愀然曰厚庵義不負某曩數致金皆爲諸子浪費吾不忍吾友蒙失德名出所償已五百金盡與之家人愕眙贊唐

起貧約未忘艱苦然至所當爲義形於色揮金如苴土有族兄弟數人貧不能取幾殄其祀皆以已門望定昏清族資給成禮其於鄉鄰窮乏歲時周卹率有常期云年六十八卒子光第縣學生忼爽有父風以親老不應鄉舉卒年卅八著寄吾廬文鈔二卷詩鈔四卷

贊曰王恥受金傅期滅賊奮蹕爲雄一官匪得李拊流亡布衣攝令孝思惟則義聲式鏡

尹顯芝列傳

子榮佳

榮傑

尹顯芝字蘭鄰其先邵陽人也曾祖思令祖名繼俱有隱德父道璨讀書尚志操履絕俗游學至秀山樂其地饒俗厚遂賃屋而居閉戶授子弟雖極困苦講誦弗輟嘗手書遺誡曰禮義有防窮達維命餓死事小失節事大人患不崇德行不患賤貧其持守確然如此性孤介流離失偶以弟道瑤次子爲後卽顯芝也顯芝生有至性動遠非儀齟齬母病夕旦侍衛越數寒暑識者歎爲成人弗逮焉旣以父命爲世父後服勤就養過於所生從父受論語雅重躬行以貧爲人司會計出納公允商賈爭趨時人蓋視芝所就卜昌其主有滑商某逋負主人千金挾貲潛遁主託往追芝間道及於漢陽商顧大驚盛筵相款陰賄金五百乞寢其事芝笑謝曰生平如苟取不至服斯役矣君乃負友顧欲以餘智污人耶某知不可奪畢償所負芝得金歸報繇是益以信義知名道光末貿遷至楚頗獲贏餘歸值大饑悉出助賑全活甚眾謂諸子曰天災流行防之宜預常平義倉不易請發後當樽節積穀千數百石設遇凶年卽力不及遠耳目近接可保勿饑咸豐十年歲復不登果賴芝積穀濟諸鄉黨知縣劉鍾璟以義洽比鄰旂其門顯芝歎曰小惠未徧召致虛聲人且疑其市名也後值歲歉輒出穀雜市中賤售遠近弗知相從減價往往銷患無形建修道路橋梁及諸濟人利物事難更僕數計所施財浮於私產數倍里人美其行詣達之院司前總督吳棠學使鍾駿聲合詞獎勵旌以聯語里有巨宅固多怪異其主

卷十

士女志

三五

不利徙而賤售顯芝付值取券遣僕值宿夜未半戰慄趨出面無人色各言鬼魅狀芝移榻僕室燭滅果聞履迹笑聲几案錚錚牖戶自闢奮起提劍逐之怪遂滅迹了無他異人遂傳尹翁能避魅云顯芝性嚴正豁達喜施讀書雖未卒業行已與人一步趨賢聖鄉先父老與游者蓋未嘗見其過行其克治然與井里惡慝芝見輒相規至不敢覲其面多改行爲善人先世力農無顯者其孫廷颺殿颺朝颺升颺以文學起其家登高第顯芝實啓焉妻田氏孝慈貞靜遇諸善舉尤樂贊成俱年八十二卒以孫殿颺官翰林院庶吉士誥贈奉政大夫

榮佳字孔章以字行別字立齋顯芝長子生而明敏仁厚有父風父旣以樂善稱於鄉孔章欣欣尤務承其志道光二十九年

卷十

士女志

三十六

邑穀貴知縣發義倉平糶率準制錢爲市鄉民稱貸恆苦錢劣孔章言於當事請稍寬假僉畏事平賠累章歎曰貧民得錢遠糶家人虛釜待烹歸而無米何以存活乃私於局外設錢肆凡不及賈者爲增之鵝眼緹環諸劣錢爲易之由是來糶無空歸者所居鄉初無義塾貧者多廢讀書請於父延師設塾以便寒儻厥後知縣張銳堂籌貲興建章塾乃已成同間黔粵餘匪竄境縣官輒飭鄉里興團練籌軍饌器械事有屬孔章者勇任之倍已私或出家財佐之勞怨無所避知縣劉鍾璟杜瑞徵先後倚以集事性純孝雖當病篤定省弗忘戚黨晉接不嫌屈已交遊尙賢遇鄉先達及後進知名必加殊禮或遣諸子從遊卒資其益彬彬然名家焉與弟孔美同居五十載怡怡無間言異居

諸舅通其有無慷慨負義不以纖微墮行年五十二卒知縣杜瑞徵歎曰天喪善人也致哀輓焉妻熊氏鄉里以賢稱以子廷颺任州判贈如其官以出嗣子殿颺階贈奉政大夫

榮傑字孔美以字行別字錦堂顯芝三子少貧廢學從兄孔章習賈出入輕重務得其平或厚予其值雖既去必追還之故童年有長者之稱咸豐十年顯芝既出積穀賑饑孔美方行賈於外恐難終濟謀之戚某併貿易米比歸適承其乏尹氏自顯芝以陰隲起家諸子率訓傳爲家法力善不衰人稱是父是子焉孔美尤篤厚生平無急言遽色性退讓與世無爭少長於兄尊事嚴謹兄卒視嫂如母嫂固多病尤好推施歲入之餘率周貧乏有來告者恣情取給不問有無孔美曲意承之或時稱貸以

卷十

士女志

三十七

濟弗恤也有豪某習知孔美良善故於廣座陵藉之觀者不直將爲報復美亟止之曰若與我厚言不爲我發也其盛德若此光緒十五年子殿颺以翰林改官山東甯陽知縣迎養不赴馳書戒曰家世清德未有愆儀鄉鄰游處警惕易周事上臨民叢過之府纖毫弗愆殃咎滋張爲計治略六事其置座隅時加修省勿玷家聲殿颺到任一年丁本生母憂去官士民萬人揭牒大府遮道請留巡撫張曜歎爲循良第一准特疏題奏會卒未果去之日攀轅送哀如嬰兒之失慈母美聞曰能不辱先人遺訓余差免過矣年七十卒於里以殿颺官誥封奉政大夫

贊曰尹氏之先遷自邵陽至性醇德萃於一堂惟天陰隲善有餘慶諸子釋褐弦歌洋洋

向百福列傳

向百福字壽山世爲鐵工百福少有大志權奇自喜咸豐五年松桃土寇掠犯秀山百福籍名鄉兵中以驍果聞六年從軍討粵寇轉戰黃梅廣濟克潛山攻太湖礮洞左股裏創力戰是時湘軍大起競爲勇敢百福因益顯名同治初以都司自領一軍攻復孝感應城京山三縣解安陸之圍連戰麻城率先士卒深入陷敵累功遷副將加總兵銜。

賞花翎自洪寇倡亂以來天下盜賊充斥然皆時起時滅獨大河南北有劫賊曰撚匪爲時大患撚匪起先粵寇至是益盛湖北四戰之區而麻城界河南居要衝寇跡出沒無常民人轉死廬市爲墟巡撫嚴樹森常汲汲謀扼麻城素倚百福能軍又約

卷十

士女志

三十八

束嚴知愛民尤裨將中所無檄將所部往未幾寇大至百福嬰城固守時出奇兵力創之禽僞將軍高國寶桂子春收降卒三千餘人其後屢撓寇鋒大小數十戰未嘗挫敗百福廉謹得士心而軍律嚴明所至無擾居麻城七年民依之如父母同治三年撚寇數萬人犯困守孤城七十餘日人心皇懼百福拊集流亡弔喪卹死饑寡惇獨廢疾者時臨存問矜全產婦以數十視其家振養之以是民益感奮男子皆起乘城卒以寡勝眾連有功麻城民喪於兵及以疫死不下千萬百福斂遺骸建白骨塔而施藥餌助耕種朔月月半糴穀散振以爲常云兩淮鹽綱當寇亂時商販皆絕小民得自攜負江南旣平淮南各復業大事清釐則肩負者皆私梟矣麻城故在引地中百福承檄嚴私緝

窮氓大蹙恥爲商用而病民稍稍容縱之羣商大譁愬總督遂被嚴譴釋兵至武昌俄卒或云仰藥自盡麻城人聞其死罷市巷哭立主關侯祠下民士不期來會弔者近千入百福臨陳喜鋒銳退居凝靜好禮士大夫嚴樹森嘗稱歎以爲有國士之風軍興十餘年諸將起家爲偏裨皆累厚資稱富室獨百福入手輒散盡勤勤施濟卒後家無餘財論者嗟美焉贊曰守死結民再撼劇賊卯字子遺披荆沐血麻城之野至今誦茲匪曰干城以爲民天

楊高林列傳

附程方龍蘇廷彪邱國良

楊朝林字耀亭故地壩洞官楊正文裔也幼機警貧無行業常爲綏甯營卒以事除名咸豐中洪寇亂廣西軼祀江淮天下響震朝林至湖北應募爲參將王某親兵戰輒有功擢外委把總七年正月從破石牌寇俘斬甚眾以勇決爲總督官文賞拔令以守備別將一軍八年戰麻城老河口樊城上庸村皆有功於是多隆阿方以威略爲時名將檄朝林隸戲下從援安徽累遷至記名總兵

賞勇號孔雀翎增統精選五營十一年八月安慶平叙功授宜昌鎮總兵記名以提督

簡放尋調鄖陽朝林善拊士卒能得其死心故所部號敢戰多

卷十

士女志

四十

隆阿每稱歎之未幾罷還從朝林官至鎮將有程友龍蘇廷彪皆有戰略友龍征江皖身受重創每搏戰以短刃衝鋒無不血染襟袖髮擻常畏憚之累遷記名提督而楊春尤以驍敢聞

高占彪字滙川家世貧微早喪父母煢煢無所依發憤出從軍初隸鮑超尋入淮軍從楊鼎勳戰江淮間同治二年攻平楓涇西塘干窰賊壘三年戰宜興復荆溪累功擢副將

賞誠勇巴圖魯遂進剿常州環城寇壘十餘占彪奮前直入薄城身被數創城破禽僞護王陳坤書占彪臨陳喜深入戰長輿礮丸中勝洞出轉攻湖州尹隆橋鎗裂左目血溢被面呼戰益急淮軍帥常從壁上見之驚歎稱健兒累遷記名提督

賞換勇號給三代正一品封典七年統勳字馬步五營逐剿山

東撚寇所向有功尋撫定防河叛卒日本滋叛至金陵募軍尤爲兩江總督李宗義所倚重旣罷兵還恥不知學頗涉覽史鑑粗能通解性疏簡不善事貴人嘗獲良馬大帥欲得之或風以獻固不與幾失權焉年五十一卒

林占魁字春山少儻略涉書傳從軍積功至副將銜泰甯營都司雅樂交文士儀度整嫻至臨陳輒奮踔先士卒咸豐八年攻柳州以五百人當寇數千礮洞右腕斷二指揮血搏戰卒復其城九年拒寇寶慶深入被重創幾死以是名益顯光緒時卒同里有邱國良字幹臣善騎爲黃鼎馬隊營官累軍功至記名名總兵勇敢有聞歸以貧死

贊曰束髮荷戈壯夫之烈楊遂作鎮高林折節巖鄉振奇中興

卷十

士女志

四十一

盛武考行已荒采其可睹

秀山縣志卷第十